

KAJIAN BATU ACEH DI PERLIS

Abstrak

Kewujudan batu nisan berbentuk batu Aceh di Malaysia yang berusia lebih 500 tahun di Sayong Pinang, Johor telah membuktikan perkembangan Islam yang dibawa dari Aceh di Tanah Melayu ketika itu. Jumpaan batu Aceh yang tertua itu bertarikh 856H (1452-1453 M) menunjukkan kesenian Islam dari Aceh membawa pengaruh besar dalam kehidupan sosial orang Islam di Tanah Melayu. Penyebaran tradisi kesenian batu Aceh ini turut meliputi Selatan Thailand, Brunei dan sebahagian provinsi di Indonesia. Ini seiring Aceh yang dianggap sebagai pintu gerbang bermulanya penyebaran Islam di dunia Melayu dan Asia Tenggara. Negeri Perlis dahulunya merupakan sebuah jajahan negeri Kedah. Hubungan Kedah dan Aceh yang terjalin atas dasar perdagangan dan politik telah membawa tradisi kesenian batu Aceh itu di Kedah. Di Perlis, kajian terdahulu menunjukkan sebanyak sembilan buah makam lama berbatu Aceh telah dijumpai di sekitar Kangar dan Kuala Perlis. Kajian lapangan yang dijalankan oleh Muzium Kota Kayang pada tahun 2017 menunjukkan terdapatnya jumpaan baharu makam-makam lama berbatu Aceh iaitu sebanyak empat buah makam di lokasi yang berbeza. Dalam kajian ini selain daripada penulisan tentang jumpaan baharu makam-makam berbatu Aceh, tinjauan semula ke makam-makam lama berbatu Aceh dalam kajian terdahulu dan penemuan sebuah tapak perkuburan lama di Kuala Perlis turut dibincangkan. Penemuan baharu ini telah menjadikan jumlah keseluruhan makam berbatu Aceh di Perlis adalah sebanyak 13 buah makam.